

pincètt

In
tânt
che mi
muntunavi
feuj smagiaa
d'aütün tra azarìn,
pìn, rugur e biancuspìn
te see vegnuu a cercamm
per cumpagnà ul bisia lingeer
di mee quiètt e cunsüètt penseer.

E peu t'hee sgulatraa, scià e là, viscul
e descantaa, fin sü i spitt del brügnoeu
e cun la gula culurida 'mè la bràs del foeuch
te spandevet ul tò dûlz gurghecc sura i loeuch
che m'han regurdaa lûnch e spensieraa giornât
d'estaa, pièn de amis e de cursi senza fin, in libertaa
intrà i bosch, sentee, proeus cultivaa e i vûs premürûs
di neust geent antîch, incîs in ümil silènzi, pièn de fadîch.

Adess te preanüncet, sgunfi e urgugliûs, un invernu silenziûs
ch'èl carezzerà, sótt a cueert delicaa, i spetatîf indurmentaa.
Propi cuurt, ma alegher e decîs l'è 'l tò fragil víf, liber e cumbatîf
ch'èl se indulziss d'una gran tenerézza, nel nìn muresìn e generûs
pièn de vûs gulûs, che tütt i matìnn ricamen festûs, ul pentagrama
d'un ceel lüminûs.

Cundividum
l'armunia
di stagiòn
e pizzigum
i stèss còrd de
la vita d'ogni dì.

Angelo Galbusera.....dicembre 2020

Nota: il pettirosso, che da noi abbiamo sempre chiamato **pincètt**, da altre parti è chiamato **picètt**

Nota bene – Ricordiamo che la proprietà letteraria di questa composizione appartiene interamente ed esclusivamente all'autore ed all'Associazione Sentieri e Cascine, che la pubblica sul suo sito. E' assolutamente vietato qualsiasi uso commerciale, mentre è consentito, citandone correttamente e interamente la fonte, utilizzarla per finalità culturali, educative, aggregative.